

四庫全書

史部

欽定四庫全書

史部

欽定八旗通志卷一百七十五

欽定四庫全書

欽定八旗通志卷一百七十五

人物志五十五

大臣傳四十一

滿洲正藍旗一 達珠瑚 達海
蘇魯達 達爾漢 阿山 薩

壁翰 鄂莫克圖 布當 鄂羅塞臣 覺羅郎
球 阿爾津 科爾崑 雅泰

達珠瑚子翁阿岱

達珠瑚姓兆嘉其先世居訥殷祖曰達爾楚

國初時來歸後隸滿洲正藍旗達珠瑚初任佐領從

太祖高皇帝征烏拉斬級四十大兵克西林屯俘其人以
歸敵衆追襲達珠瑚還擊敗之斬級五十旋率兵
征葉赫斬級三百俘五十人又遇越界採薇者斬
三十人俘六人敵侵我寧古塔境達珠瑚率護軍
出戰斬敵一將兵百人獲甲百馬三百叙功授三
等男天命十年率兵征東海瓦爾喀部凱旋

太祖出郊宴勞之明年征卦勒察部俘人戶獲馬牛無算
太宗文皇帝即位擢列十六大臣佐理鑲黃旗事天聰元

年大兵征朝鮮克義州留兵駐守

命達珠瑚分統之後復率兵征瓦爾喀斬獲甚衆軍還為
俘卒所害年六十有三八年以其子翁阿岱襲爵
會大兵復征瓦爾喀

諭諸將曰前所遣達珠瑚以疎遇害念其効力年久著有
勞績方令承襲世職爾等未能如達珠瑚之功倘不自
慎欲希格外之恩不可得也

世祖章皇帝順治十二年追謚襄敏視一品大臣例立碑

翁阿岱初任佐領既罷父爵管叅領事隨都統巴
奇蘭薩穆什喀征呼爾哈部有功加一雲騎尉崇
德三年授工部副理事官四年擢都察院叅政兼
正藍旗副都統五年正月奉

命同副都統多積禮率兵防禦錦州稽察叛逃六年大軍
圍錦州駐營城南山巔明總督洪承疇集衆松山
以步兵來犯我左翼兵戰失利翁阿岱時守右翼
營率兵突前衝擊敵乃潰走追擊之山下敗其騎

兵復與叅領鰲拜率護軍破敵步兵營捷

聞得

優賚尋合兩翼兵擊敵松山薄營力戰歿於陣

賜卹白金千兩晉爵一等男無子以其弟之子濟木布襲

達海

子拉們

達海滿洲正藍旗人世居覺爾禪以地為氏祖博洛於

國初歸附父愛密禪官至散秩大臣達海其第三子

也九歲讀書能通清漢文義弱冠

太祖高皇帝召直文館凡

國家與明及蒙古朝鮮詞命悉出其手有

詔旨應兼漢文音者亦承

命傳宣悉當

上意旋奉

命譯明會典及素書三略天聰三年十月

太宗文皇帝親統大兵征明十二月破滿桂等四總兵軍

上不欲究武遣達海賫書與明議和明人閉關不啟踰日復賫書二分置德勝安定二門外旋回軍由遵化畧地而歸四年正月從大兵征明至沙河驛以漢語諭降其衆至永平乘夜攻其城克之

上命達海執黃旗登城諭官軍百姓薙髮來降城中望見車駕環跪呼萬歲時貝勒阿巴泰等率明投誠副將孟喬芳楊文魁遊擊楊聲遠自永平入

見達海承

旨慰勞之先是三屯營漢兒莊俱已歸順既而明兵嚴三

屯營

上慮漢兒莊降人復叛令達海與啟心郎穆成格副將石
廷柱等率兵往偵以漢語諭之遂撫定漢兒莊四
月貝勒大臣等將自永平凱旋

上令從容謁見所行事宜即令來使奏聞達海傳

諭還奏悉稱

旨是年繙譯書成授三等輕車都尉五年七月

賜號巴克什九月從攻大凌河既破明兵擒監軍道張春等文武三十三人達海宣

上恩德諭之降十月復偕石廷柱招明總兵祖大壽先遣陣獲叅將姜新入城既而新偕大凌河遊擊韓棟至傳大壽意曰乞使石副將過濠將布心腹於麾下達海曰未奉

上命不敢令往棟因送大壽子為質乃使廷柱往與大壽語越日遂降十一月

上宴歸降各官達海傳

諭慰勞如初十二月議定朝賀禮儀明年三月詳定

國書字體初

太祖指授文臣額爾德尼及噶蓋創立

國書形聲規模大體略具達海繼之增為十二字頭

至是

上諭達海曰國書十二字頭向無圈點上下字雷同無別

幼學習之遇書中尋常語言視其文義猶易通曉若人

名地名必致錯誤爾可酌加圈點以分晰之則音義明曉於字學更有裨益矣達海遵

旨尋繹酌加圈點又以

國書與漢字對音未全者于十二字頭正字之外增
添外字猶有不能盡叶者則以兩字連寫切成其
切音較漢字更為精當由是

國書之用益備是年六月病逾月卒疾亟時

上召侍臣垂淚諭曰朕以達海偶爾疾病猶冀其痊愈今

聞病篤深軫朕懷其及身未曾寵任當優恤其子爾等
以朕言告之

賜蟒緞令侍臣賁往達海聞

命感愴垂淚已不能言矣時方譯通鑑六韜孟子三國志
大乘經未竣而卒七年二月

詔以其長子雅泰降一等襲職授騎都尉仍管佐領文臣
例無世職蓋異數也十年二月

上以達海通漢書習典故為國宣力注念不忘復

召見其子三人

賜饌

賜幣并

諭其次子辰德勤習漢書

賜達海諡曰文成雅秦別有傳第三子拉捫以前鋒統領
從征逆藩吳三桂與賊戰衡州歿於陣贈雲騎尉
達海少子常額當雅秦卒後

特授學士雅秦子禪布康熙八年任秘書院學士為達海請

賜立碑得

旨達海巴克什通滿漢文字於滿書字加添圈點令其分明又照漢字增造字樣於今賴之念其効力年久著有勤勞著仍追立石碑

蘇魯邁

子蘇爾濟鄂洛順翁鄂洛

蘇魯邁滿洲正藍旗人姓嵩佳世居棟鄂部父遜扎哩

太祖高皇帝時來歸授其長子蘇巴海為佐領蘇魯邁其

次子也天命三年蘇嚕邁從

上征明撫順樹雲梯攻城蘇嚕邁先登克之六年授佐

領

上統大軍取瀋陽遼陽蘇嚕邁並從征有功

太宗文皇帝天聰元年隨大貝勒阿敏征朝鮮薄義州城
蘇嚕邁率二十人先登諸軍繼之遂取義州俘獲

無算三年從

上征明攻克洪山口城予騎都尉世職四年春

上統師圍永平

命副都統阿山葉臣等率勇敢士二十四人乘夜攻城蘇
魯邁與馬城上鎗礮交發蘇魯邁面中鎗不退乘
敵礮裂自焚遂冒火樹雲梯登城大軍繼進取永
平

上遣醫診視鎗傷

賜號巴圖魯

賁牲畜布帛晉世職為三等輕車都尉尋征明旅順口及

寧遠被重傷得

優賚宗德元年隨武英郡王阿濟格征明北京入邊時攻
鵬鵠城中礮傷口因以殘疾家居順治七年九月

三遇

恩詔晉爵三等男康熙元年十一月卒

賜祭葬如典禮謚勤勇次子遜塔襲爵仕至副都統長子

蘓爾濟初任前鋒侍衛順治元年隨睿親王多爾

袞討流賊李自成同前鋒統領錫特庫擊敗賊將

唐通于一片石三年隨端重親王博洛征福建敗
明總兵姜正希于汀州叙功予雲騎尉世職遇

恩詔晉騎都尉七年卒無子以蘇嚕邁之第三子三塔哈

麟第四子鄂洛順初任二等護衛康熙十四年隨
建威將軍佛尼埒討逆藩吳三桂由陝西進四川
擊敗偽總兵高定尋授護軍叅領二十九年調前
鋒叅領隨裕親王福全征噶爾丹有功三十年任
江寧副都統三十四年擢江寧將軍四十四年七

月卒

予祭葬如例第五子翁鄂洛初襲兄三塔哈騎都尉世職
康熙二十年隨征南大將軍賚塔討逆孽吳世璠
由廣西進師偽將軍何繼祖擁衆據石門坎翁鄂
洛與都統希福等擊敗之繼祖遁據黃草壩與賊
將詹養王有功等合兵拒戰翁鄂洛復大敗賊衆奪
其營詹養王有功俱就擒師至雲南殲賊黨胡國
柄復追勦賊將馬寶巴養元等凱旋叙功晉三等

輕車都尉世職尋卒以其子鄂奇龍騎都尉兼一
雲騎尉世職

達爾漢

達爾漢姓郭絡羅初隸滿洲鑲黃旗後改隸正藍
旗父揚舒為沾河寨長

太祖高皇帝時率所部來歸尚長公主為額駙從征尼堪
外蘭攻薩爾滸城以計擒其長諾密納而誅之嗣
從征屢有功及卒

太祖親臨其喪達爾漢為長公主所出初任佐領尚和碩
公主為額駙從征葉赫誅其貝勒錦台什積功授
一等男

太宗文皇帝即位擢列八大臣任鑲黃旗都統隨大貝勒
代善征扎魯特部單騎追擒其台吉以歸復征棟
變俘古穆楚赫爾及杜喀爾代青多爾濟三塔布
囊父子晉爵三等子天聰元年隨大軍征朝鮮克
義州定州安州斬其府尹李筦等朝鮮國王李倧

請議和達爾漢與都統納穆泰等泣盟師還

上賜宴勞之復從

上征明攻錦州有功先是貝勒阿巴泰因

賜宴時不得與大貝勒並列使達爾漢以耻與子弟列坐

意代奏

上諭達爾漢曰爾宜勸諭之奏朕何為者至是察哈爾使臣昂坤等來歸設宴阿巴泰復使納穆泰申奏

上以達爾漢有啓導貝勒之責前此不能勸諭而以其言

入奏

命鮮都統任尋復之三年從攻遵化率鑲黃旗兵攻北面之西克其城四年赦漢奈曼諸蒙古兵從征明攻昌黎不克

詔遣達爾漢與都統喀克篤禮等率兵千人馳赴應援達爾漢進攻又不克會永平灤州皆下有

詔班師遂焚其近城廬舍而還五年三月

上諭八大臣指陳政事闕失達爾漢奏曰臣以微賤之軀

拔至大臣之列如

國家果有過舉豈敢不言既無闕失指諫何從至于
小民懷怨實有自來豈有政治和平而致怨者臣
請自今洗心正己矢公審斷以協羣情凡有所見
盡心直告以圖報稱而已七月從攻大凌河城率
本旗兵圍北面之東深溝築壘與都統楞額禮等
環城固守八月明人以步騎五百出戰達爾漢率
八十人擊敗之越日敵復出兵誘戰又率本旗兵

邀擊明兵墮壕死者百餘人六年從

上親征察爾軍次哈納崖達爾漢從者蒙古二人于軍

中盜良馬六潛奔察哈爾告以大軍至林丹汗舉
部西奔驅歸化城富戶及牲畜盡渡黃河而去達
爾漢坐家人漏洩軍情降爵一等男七年明登州
叅將孔有德以所部及戰艦來降達爾漢與都統
篇古駐兵江岸守其船八年復從征察哈爾遂入
明上方堡毀其邊牆進畧朔州分兵直抵宣府右

衛是歲

命免功臣徭役達爾漢與烏並增給佐領下人戶九年

上遣諸貝勒統師征明山西

命達爾漢同都統阿山等營于要地制明寧錦兵使不得
西援途遇敵兵八百共擊敗之斬錦州副將劉應
選凱還得

賞所俘獲崇德元年五月都統篇古拜音圖譚秦葉臣阿
山石廷柱奏劾都統伊爾登讒謗諸王及大臣下

法司勘訊達爾漢助伊爾登訴辯以證辭先後互異坐罰鍰是月武英郡王阿濟格征明攻順義縣達爾漢率本旗兵先登叙功晉爵一等子尋以克順義城不謀固守致敵復攻陷且縱兵離伍為敵所殺坐罰鍰奪所俘獲十二月隨征朝鮮明年部議朝鮮王李倬謁

上時達爾漢亂班釋甲又於

上前言不飲酒出輒私飲并論其失察徇情諸罪應罰鍰

追奪

賞賜得

旨罰鍰以懲六年隨鄭親王濟爾哈朗等征錦州師還部
議達爾漢子王名議禦敵時不即至及護軍統領
鰲拜擊敗明步兵達爾漢妄謂敵兵為豫親王多
鐸所敗且噉副都統翁阿岱等與諸護軍爭功坐
革世爵并罷都統任順治元年卒年五十有五長
子鄂羅塞臣別有傳

阿山

阿山姓伊爾根覺羅世居穆溪

太祖高皇帝時阿山與其弟阿達海濟爾琿噶賴從父阿爾塔什率七村戶口來歸隸滿洲正藍旗

太祖以宗室女妻阿爾塔什為額駙而以阿山與阿達海等令大貝勒代善轄之阿山以大貝勒置之閒散
缺望有異志與諸弟及其子塞赫等逃之明

太祖命收其孥遣兵往追斃其二子阿山至明界明臺軍

戮其從人于是阿山惶懼與阿達海等復歸請罪
上以其悔罪來也

宥之而還其孥不令屬代善置諸

左右備使令責立後劾天命六年從征遼陽有功授二等

輕車都尉世職

太宗文皇帝嗣統擢居十六大臣之列佐理正白旗事扎
魯特之役阿山奉

命與都統楞額禮率六百人入巴林多俘獲還晉爵三等

男天聰元年從征朝鮮攻克義州城三年同額駙
揚古利至雅爾古偵軍事遇明故將毛文龍部下
採獲者擊斬甚衆大兵証明從攻洪山口取其城
趨燕京軍于城西南隅阿山同叅領圖魯什周視
敵營請速進攻

上是其言

命卽以是夜三鼓列陣明日陣獲其總兵麻登雲等四年
圍永平乘夜力戰會城上砲裂藥發阿山與副都

統葉臣以猛士二十四人冒火登諸軍總進大破
之遂取永平

太宗嘉其驍勇晋三等子五年從征大凌河率銳騎領錦
州松山路俘獲明兵其守將來援阿山與前鋒統
領勞薩以兵三百敗其衆二千斬首百餘級獲三

纛

上特召至酌以金卮尋授都統六年

上統大軍親征察哈爾阿山與副都統布爾吉先率兵防

邊聞

駕臨西拉木倫河以衆來會遂奉

命率八旗將領及精兵三百人往助圖魯什前哨軍值察
哈爾汗道遁乃還復率兵防邊捕斬逃逃蒙古五
人以獻明年與布爾吉往偵鹿島俘獲甚多八年
三月與圖魯什等稟受

方畧至明錦州畧地貝勒岳託謂圖魯什曰軍中調遣事
宜當就阿山商之勿違其言遂往畧地獲牲畜五

月復從征察哈爾收集蒙古之潰亡者以歸十二
月

詔免功臣徭役阿山與烏並給呼爾哈俘百編屬佐領九
年明國聞我師征山西將調山海關兵往援

上命貝勒多鐸軍廣寧阿山與都統石廷柱領前鋒兵四
百先趨錦州會明副將劉應選劉成功等引兵三
千五百人來禦遇于大凌河未及戰貝勒兵疾馳
繼至自山而下士馬騰藉軍容甚盛敵望塵驚潰

阿山突入掩擊我軍分路追勦陣斬應選擒遊擊
曹得功等四員殲其兵五百人復攻克臺堡一凱
旋

上率諸貝勒郊勞

賜良馬鎧甲以旌異之崇德元年隨武英郡王阿濟格征
明攻下鵬鶚長安嶺二城又率本旗兵攻克東安
縣師還明兵來追阿山殿後擊斬畧盡既班師

迎勞如初是役也以出邊先歸不俟後軍俱至論奪所俘

獲二年與葉臣率左翼舟師攻皮島西北隅先登克之斬守將沈世魁晉一等子予世襲四年部臣追論阿山于朝鮮王謁

上時亂班釋甲及士卒離伍諸罪坐罰贖六年二月隨睿親王多爾袞圍廣寧先登斬敵散其城有俘獲三月隨征錦州以聽從睿親王離城遠駐私遣兵歸家論死

命改輸罰鍰八月復攻錦州抵濠環守敗松山騎兵之援

錦州者錦州兵突圍出犯我營松山守將潛謀奪
我紅衣礮阿山連擊敗之七年三月部議錦州兵
犯鑲黃旗營貝子尼堪不察舉我軍之未戰者阿
山坐狗情附和應論罰有

詔寬免先是阿山從武英郡王出征時欲奏其雄縣石橋
會戰功屬稿啟王王曰石橋會戰無殺敵俘獲功
無可書取其奏稿削之既而阿山子塞赫與護軍
洪科忿爭洪科遂訐塞赫隨征雄縣石橋退縮事

兵部以問武英郡王王以削阿山奏稿為證及詢
阿山阿山又曰石橋未嘗交戰亦未嘗以疏稿啟
王及察疏稿王言實于是部臣議曰阿山邀功則
云我曾交戰聞訐其子退縮則云未嘗對敵誕妄
偏袒應革世職罷都統任尋又以私取外藩蒙古
進獻財物事論罪應奪所俘獲並得

旨寬貫令罰贖十月奉

命與饒餘貝勒阿巴泰復征明入墻子嶺取邊城至兗州

屢敗敵兵分遣將領攻拔數城

恩賞銀幣順治元年從擊流賊李自成於山海關自成敗走阿山復偕左翼副都統阿哈尼堪右翼都統瑪喇希濟蒲津擊破之遂同諸將鎮守平陽二年叙功晉爵三等公是時西安已定豫親王多鐸移師安撫河南進取江南阿山奉

詔與諸將各領所部從至泗州與瑪喇希等取淮河橋遂渡淮攻拔揚州進次揚子江明鎮海伯鄭鴻逵等

以水師扼瓜洲及儀徵阿山率舟師浮運河而南
與右翼舟師分列大江東西岸敵至則以礮夾擊
之遂攻下江寧追擒明福王朱由崧于蕪湖江南
既定同貝勒博洛及都統拜音圖招撫浙江軍次
杭州明潞王朱常淂迎降嘉興湖州紹興寧波嚴
州皆下凱旋

賜金銀鞍馬三年正月巫者薩海以阿山佐領下雅巴海
之妻與人私通事告阿山阿山信之徙雅巴海而

幽其妻雅巴海妻奔逸訴于刑部部鞠訊得薩海
誣告狀阿山坐妄聽巫言削爵罷都統任旋復授
一等子四年五月卒子塞赫蘇

薩璧翰

子喀爾沁孫喀爾弼

薩璧翰滿洲正藍旗人姓納喇先世居輝發父三
檀

太祖高皇帝時率屬來歸任佐領既卒薩璧翰與其兄薩
珠瑚並授佐領

太宗文皇帝即位以薩壁翰列十六大臣管正藍旗副都統事天聰五年設六部為戶部承政是年八月從

上征明圍大凌河城明總兵祖大壽遣兵出城來犯薩壁翰舍騎步戰逐敵薄壕獲馬一敵哭于城上發礮矢我軍士巴遜歿于陣薩壁翰衝入敵陣取其屍以還八年五月

上親統大軍征察哈爾以貝勒濟爾哈朗留守

盛京薩壁翰同副都統蒙阿圖副之十一月考滿予

騎都尉世職崇德二年大軍征朝鮮及明皮島凱旋薩壁翰同其兄薩珠瑚首貝子碩託隱匿貝勒岳託所獲馬又以死于皮島之廝役六人詭稱甲士冒領賞賚碩託坐罰鍰薩壁翰族屬初隸碩託下至是奉

命改籍饒餘貝勒阿巴泰會薩壁翰之從子侍衛烏達禮隨征朝鮮私携蓋州駐防甲士為廝役事覺薩壁翰坐失察革世職三年裁六部承政各一員改薩

璧翰為吏部右叅政四年列議政大臣六年八月
隨大軍圍明錦州明援兵自松山誘戰陸璧翰被
創卒于軍長子哈楚罕襲佐領次子喀爾沁亦任
佐領康熙十三年擢護軍叅領隨大軍討逆藩吳
三桂攻沅江縣被創

賁銀五十兩先後得功牌三十六三十五年隨撫遠大將
軍費揚古征噶爾丹戰于昭莫多有功予雲騎尉
世職哈楚罕之子哈爾弼任一等護衛康熙十八

年隨寧海將軍拉哈達擊海賊鄭錦於廈門歿於陣亦予雲騎尉世職

鄂莫克圖

鄂莫克圖姓納喇世居葉赫

太祖高皇帝時來歸隸滿洲正藍旗初任護軍校天聰元年正月大軍征朝鮮鄂莫克圖隨副都統阿山等攻克義州城五月

太宗文皇帝統師征寧遠明總兵滿桂於城東二里列陣

抗拒鄂莫克圖隨諸將進擊殪敵無算三年隨貝勒岳託征明大同攻保安州城先登克之

賜號巴圖魯授三等輕車都尉世職任叅領八年隨步軍

統領巴奇蘭等征黑龍江呼爾哈部崇德二年復隨都統葉克舒征卦爾察並俘獲丁壯視諸叅領獨多三年七月授兵部理事官九月隨睿親王多爾袞征明由青山口毀邊牆入過燕京擊敗明太監馮永盛兵攻克臨洺關城畧地至濟南府明年

三月班師同啟心郎詹霸先還奏捷七月

上遣使齎書與明議和

命鄂莫克圖同前鋒叅領努山等率兵護以行五年授前
鋒統領隨大軍圍錦州明總兵祖大壽糾衆迎戰
鄂莫克圖率所部先諸將敗敵追逐至城濠六年
復圍錦州明總督洪承疇自松山赴援為大軍擊
敗鄂莫克圖追其潰卒至筆架山斬級甚衆獲其
馬與纛承疇集兵十三萬分據杏山乳峯山

上統師親征駐營松山杏山間鑿濠塹絕其糧運明兵自
松山夜遁鄂莫克圖追敗之海濱敵騎自杏山遁
又步兵潰奔塔山鄂莫克圖先後邀擊並多斬獲
七年隨軍圍杏山分兵畧寧遠獲牲畜以還明總
兵吳三桂以兵六百躡我後戰卻之尋益兵來窺
我營鄂莫克圖拒戰大捷窮追至連山敵騎五十
自沙河所犯我牧地復往奮擊敵遁走並敗其後
隊兵四百錦州既下晉世職二等輕車都尉

世祖章皇帝順治元年隨睿親王多爾袞入山海關擊流
賊李自成追敗之安肅及望都尋率前鋒兵征山
西殲流賊于絳州渡口二年隨英親王阿濟格征
陝西破賊延安自成走湖廣追勦至安陸連破賊
營獲賊艦三十是年叙入關戰功晉一等輕車都
尉三年隨肅親王豪格征張獻忠過漢中擊敗叛
鎮賀珍兵進勦獻忠于西充同護軍統領德爾得
赫等連破拒戰賊衆叙功加一雲騎尉三過

恩詔晉爵一等男十一年授正藍旗滿洲副都統十三年
致仕康熙十二年卒年七十有八

賜祭葬如例子綽世琦襲爵

布當

弟色稜

布當姓博爾濟吉特初為烏魯特部貝子

太祖高皇帝天命七年布當與其叔父台吉恩格類各率
所部同貝勒明安等來歸別立烏魯特蒙古一旗
賜賚優厚授世職有差恩格類為三等輕車都尉布當為

二等輕車都尉天聰三年

太宗文皇帝證明布當隨貝勒阿巴泰等左翼兵入龍井
關攻遵化明山海關總兵趙率教等以步騎四千
來援布當與叅領英俄爾岱合軍奮擊大敗明兵
叙功晉爵三等男六年從征察哈爾師還以俘獲
數少又弗即遵

諭歸隸戶籍且所獲牲畜妄費殆盡及私行圍獵諸罪部
議罰鍰奪回

賜物及俘獲

詔以布當與諸歸順蒙古所行多違例不令別立蒙古旗
俱分隸諸貝勒各佐領下于是布當與恩格類並
隸滿洲正藍旗崇德三年布當擢刑部右叅政四
年卒于衮濟齋爵恩格類卒無子以布當弟色稜
齋色稜初從

太宗文皇帝征明克遵化圍錦州並有功

世祖章皇帝順治元年隨睿親王多爾袞入山海關敗流

賊李自成二年復隨豫親王多鐸追擊流賊至潼
關師旋賊分兵躡我後色稜與都統恩格圖殿後
擊敗賊衆三年隨豫親王追擊叛逃蒙古騰機斯
敗喀爾喀部土謝圖汗碩雷汗援兵叙功並遇

恩詔晉世職至一等輕車都尉兼一雲騎尉十二年卒子

扎木揚麟

鄂羅塞臣

鄂羅塞臣滿洲正藍旗人姓郭絡羅額駙達爾漢

長子也天聰元年從其父征明錦州有斬獲尋任
護軍叅領三年從征明燕京同護軍統領哈寧阿
破明巡撫袁崇煥營

太宗文皇帝嘉其善戰授騎都尉世職四年署都統事隨
貝勒阿巴泰等鎮守永平因取糧遇明兵自開平
衛迎戰擊敗之五年從征明圍大凌河城連敗城
中出戰兵八年隨貝勒薩哈廉畧明山西邊境與
崞縣兵遇鄂羅塞臣從第三隊先衆擊敗斬四人

獲其馬累功晉二等輕車都尉崇德元年從征朝鮮與副都統薩穆什喀等敗其援兵二年列議政大臣三年十月隨豫親王多鐸征明寧遠錦州有擒斬謀卒功十一月豫親王至中後所將往會鄭親王濟爾哈朗軍為明總兵祖大壽所蔽叅領翁克等及隨征土默特部兵先奔鄂羅塞臣同護軍統領哈寧阿等且戰且退士卒有死傷者論罪罰贖革世職六年三月隨征明圍錦州以聽從睿親

王多爾袞等私遣兵丁歸家及離城遠駐坐罰鍰
六月復隨鄭親王圍錦州殲其樵採者九人連敗
明總督洪承疇松山援兵是時祖大壽據錦州哭
糾少騎出城來犯我鑲黃旗營我左翼三旗騎兵
多避敵鄂羅塞臣同叅領阿桑喜率護軍直前奮
擊敵挫衄乃遁肅親王豪格欲袒庇三旗之未戰
者睿親王附和之皆使人謂鄂羅塞臣曰爾所敗
明兵勿言皆爾護軍力亦勿言戰時未見騎兵也

于是功罪概不論明年事

聞

上命罰睿親王白金五百肅親王白金千兩予鄂羅塞臣
以旌之復授二等輕車都尉世職擢任副都統八
年同叅政巴都禮等征黑龍江克之撫定其地順
治元年凱旋

世祖章皇帝遣侍郎明安達禮往迎宴勞以所獲戶口分
隸八旗二年隨大軍擊流賊李自成師抵潼關賊

嬰城固守鄂羅塞臣奮勇先登殺賊無算五年正

月

命統兵駐守滄洲十二月復率兵赴英親王阿濟格軍協

勦叛鎮姜瓖六年以錄叙世効勞績舊臣晉一等

輕車都尉

詔以鄂羅塞臣為和碩公主子

特恩晉爵三等男世襲罔替是歲七月擢正藍旗蒙古都

統尋兼任刑部侍郎兩遇

恩詔晉二等子七年坐讞獄狗情罷侍郎任明年授都察

院左都御史尋解任專管都統事十三年以疾乞
休不允十六年同安南將軍明安達禮率兵駐防
荊州會海賊鄭成功犯江寧鄂羅塞臣同明安達
禮等赴援戰于揚子江中海賊敗竄十七年還京
仍任都統康熙三年卒贈太子太保

賜祭葬謚果敏子鄂忒渾襲

覺羅郎球

覺羅郎球滿洲正藍旗人

景祖翼皇帝第三兄索長阿之曾孫也初任理事官兼護軍叅領天聰三年從

太宗文皇帝征明燕京以中途逗遛罰鍰奪所俘獲九年大軍征明廣寧郎球同叅領圖賴等率兵四百先趨錦州有斬獲功擢刑部承政兼護軍統領進列議政大臣崇德三年睿親王多爾袞征明

上親帥諸王送之豫親王多鐸不至

詔禁王不得出府門是時郎球為豫親王屬下

上因怒曰朕屢諭郎球王若有過爾當諫諍乃竟諂媚逢迎見王怠玩如此不行規正可速執之既而

上命豫親王同大軍赴山海關制明寧遠錦州援兵

諭諸王貝勒大臣曰多鐸等前罪姑俟班師後議郎球出任職如初會豫親王軍行失律

上欲申飭其罪

命郎球召王郎球違

命不往

詔解任下廷議并論前罪明年五月王大臣等以郎球瞻

徇隱默復藐視

上命罪應死籍沒奏

聞得

旨從寬革世職罷任六年隨征錦州與副都統星訥擊敗

松山援兵登山克敵又與叅領鰲拜敗敵步兵論

功抵前罪復任叅領

命率護軍助內大臣錫翰等設伏高橋擊敗杏山逃兵追至塔山斬獲甚衆七年授禮部叅政明年擢承政

順治元年

世祖章皇帝定鼎燕京郎球任禮部尚書贊定

郊

廟大典二年授騎都尉世職三年隨順承郡王勒克德渾征湖廣流賊師至石首縣偵知賊欲渡江攻荊州大軍進擊郎球先率兵趨江濱斷賊後路取賊船

千餘賊自荊州敗還不得渡悉為大軍斬獲四年
六月考滿晉三等輕車都尉六年授本旗都統兼
吏部尚書七年四月調刑部尚書先是五年九月
鄭親王濟爾哈朗統兵之長沙郎球署副都統以
隨至是凱還得

優賚八年正月英親王阿濟格有罪郎球坐徇隱罷任削
世職籍家產之半明年三月復授禮部尚書十月
列議政大臣十一年加太子太保尋加少保兼太

子太保調戶部尚書十三年五月以員外郎朱世德虧缺權稅戶部援

恩詔請豁部臣均坐狗庇郎球削少保解任康熙五年二月卒年七十有三

賜祭葬如例

阿爾津

阿爾津姓伊爾根覺羅世居穆溪父齊瑪塔

太祖高皇帝時來歸隸滿洲正藍旗任侍衛阿爾津初與

其從兄阿山屢從征伐積功授二等輕車都尉世
職任叅領

太宗文皇帝天聰四年都統納穆泰等駐守灤州明兵來
攻阿爾津力戰弗能却敵發巨礮擊城城將墮納
穆泰等度不能支率衆走永平阿爾津隨行遇敵
斬殺甚衆及永平復失守

上命盡繫諸將以阿爾津於灤州城内曾力戰既出復能
殺敵

特賞之九年大軍征察哈爾阿爾津隨貝勒岳託駐歸化城有博碩克圖汗之子結阿祿部喀爾喀部陰與明通阿爾津與叅領吳巴海等擒其往來使者並獲馬駝及貂皮等物晉世職一等輕車都尉崇德元年

上親征朝鮮其國王李倣遁入南漢山城阿爾津率精銳追躡敗其援兵于要隘二年率每旗親軍五人往鐵山緝明哨卒尋列議政大臣管護軍統領事三

年隨豫親王多鐸征明過中後所明總兵祖大壽以兵嚴追阿爾津殿後部卒被殺及王督兵還擊阿爾津戰弗力又不收載亡卒骸骨坐革世職籍家產半仍管護軍統領事五年隨大軍圍錦州以離城遠駐坐罰鍰六年明總督洪承疇守松山阿爾津屢擊敗其步騎兵敵走保一臺阿爾津率三旗護軍攻克其臺斬敵將三人盡殲其衆復破敵營三并援出前鋒之被圍者

上嘉其善戰仍授三等輕車都尉世職七年從征寧遠敗
城中出戰兵八年同護軍統領哈寧阿等往征瑚
爾哈部攻克博和哩諾爾噶勒都里三屯其大噶
勒達蘇小噶勒達蘇綽康纏能吉勒四屯皆降俘
獲無算師還得

優賚順治元年隨大軍入山海關擊敗流賊李自成率前
鋒軍追及於安肅縣斬殺甚衆二年晉二等輕車
都尉兼一雲騎尉尋隨豫親王討流寇至潼關賊

將劉方亮來窺我營阿爾津率五旗將士擊破其
衆賊望風奔潰我師遂入關賊渠李自成焚所居
室挈子女奔商州阿爾津將兵往追不及別圍賊
三百于途盡殺之乃還復從征江南有功晉三等
男三年五月同護軍統領鰲拜等擊敗叛鎮賀珍
兵于漢中張獻忠自四川率馬步兵來戰阿爾津
與護軍統領蘇拜等連擊敗之時正藍旗兵為賊
所困復與蘇拜等往援之出進攻叙州所至克捷

五年六月晉一等男十月率兵赴宣化平赤城叛
兵六年解護軍統領任七年復任護軍統領八年
與都統額克青等舉劾英親王阿濟格罪狀初睿
親王多爾袞薨英親王以阿爾津舊隸豫親王下
使人召之阿爾津因睿親王嘗禁諸王属下人與
英親王往來謂使者曰吾弗至王所三年矣當告
之睿親王属下大臣遂詢之額克青等僉曰宜往
覲其言動乃往英親王責其不附已且妄為大言

阿爾津還告額克青等于是共訐英親王言動悖
亂諸罪鞠寔幽禁阿爾津得獎叙晉爵二等子兩
過

恩詔晉一等子加一雲騎尉九年授安西將軍鎮守漢中
尋

命為定南將軍移勦湖廣賊寇十一年由護軍統領遷都
統十二年授寧南靖寇大將軍統師之荊州時歸
州賊姚黃等出沒宜昌襄陽間阿爾津率兵往剿

連破走之招撫兵民萬餘分置枝江松滋諸邑十
三年同都統卓羅等征辰州賊聞大兵至棄城走
追破之于瀘溪賊盡竄入山谷斬獲無算遂復辰
州凡寶慶永順諸土司悉籍所轄人戶來降先是
辰州屢下緣守兵寡輒復為賊陷至是阿爾津議
移常德鎮兵守之而別移兵駐常德為應援否則
以所部兵留守辰州咨商經畧大學士洪承疇承
疇以常德兵力難分禁旅不宜擅留覆之阿爾津

復移咨曰辰州境內之民及各土司相率歸順若
增兵守之則沅靖可達沅靖一得可進取滇黔今
棄而不守賊必復來我士馬疲煩豈能數踰越
險阻且百姓既歸附一旦棄之去非唯失向化之
心亦無以示信于後也承疇以其言疏

聞

上命阿爾津班師以鎮守事委承疇速籌十五年正月奉
命統本旗兵隨信郡王多尼進取雲南五月病劇卒于軍

贈太子太保謚端果立碑如例子濟世嚴爵

科爾崑

科爾崑滿洲正藍旗人姓阿顏覺羅世居瓦瑚木
父碩色任佐領科爾崑初為貝勒阿巴泰護衛天
聰六年從

太宗文皇帝征察哈爾崇德元年從征朝鮮皆有功授前
鋒護衛五年隨鄭親王濟爾哈朗攻明錦州明師
數萬據松山科爾崑同佐領索渾前鋒叅領瑚里

布誘敵步戰敗之明總督洪承疇總兵祖大壽合
兵十餘萬迎戰科爾崑同索渾等衝入敵陣俘斬
無算六年隨英親王阿濟格駐師杏山寧遠敵騎
數千來犯科爾崑先衆馳擊敗敵追至連山馬中
流矢仆科爾崑躍起斃敵甲騎奪馬而還尋隨英
親王閱視寧遠長壕敵騎猝至索渾陷重圍科爾
崑單騎翼以出沙河所數千騎犯我牧地科爾崑
率前鋒逆擊敗敵躡追之與明援兵遇射殪一人

七年隨貝勒阿巴泰征明自薊州入邊次豐潤遇
明總督范志完軍奮擊破之又同前鋒叅領鄂碩
敗敵援兵至河西務以數十騎偵敵敵見我軍遁
走科爾崑追及一騎手搏之敵與馬俱墮水擒以
歸八年授佐領兼兵部理事官

世祖章皇帝順治元年四月隨睿親王多爾袞討流賊李
自成擊敗賊兵于山海關追至望都六月隨都統
葉臣征山西進攻太原賊兵突出城拒戰科爾崑

擊敗之設伏以待夜半賊果至伏發盡殲焉又隨
英親王追李自成于湖廣連破賊營叙功授世職
騎都尉兼一雲騎尉三年隨肅親王豪格征流賊
張獻忠過漢中擊敗叛鎮賀珍兵進擊獻忠于西
充之鳳凰山大破之獻忠既殲復分勦其餘黨斬
獲甚衆五年凱旋晉三等輕車都尉遇

恩詔晉二等輕車都尉六年任前鋒叅領隨鄭親王濟爾

哈朗征湖廣是時明桂王朱由榔以其衆據湘潭

科爾崑與前鋒統領席特庫努山等先薄城破其
西門遂取湘潭下寶慶武岡分兵趨沅州偕前鋒
叅領白爾赫圖以數十騎擊賊白爾赫圖陷圍失
馬科爾崑奪敵馬掖之上並馬突圍出復縱騎奮
擊大敗賊進克沅州又克道州龍虎關復遇

恩詔晉一等輕車都尉兼一雲騎尉九年隨敬謹親王尼

堪征衡州桂王將李定國列象陣抗拒科爾崑對陣
射之貫象鼻象奔大破賊兵又敗孫可望于寶慶

時敬謹親王自衡州進征遇賊伏歿于陣貝勒屯
齊遣學士碩岱同科爾崑先還奏捷不言王陣歿
狀既而事

聞下議政王貝勒大臣會勘科爾崑應褫職籍沒

上從寬僅革世職十三年擢護軍統領十四年孫可望與
李定國相攻不勝携妻子來降定國遂與同列白
文選等擁由榔據雲南

詔大兵三路進取貴州寧南大將軍宗室羅託自沅州進

科爾崑率兵從既取貴陽羅託駐守令科爾崑率
兵五千取黃平州以副都統瑪爾賽副之科爾崑
聞白文選方踞七星關議以瑪爾賽分兵二千由
大道緩進誘文選出戰且戰且却而自統兵三千
由間道疾趨乘其後瑪爾賽至萬奇嶺文選果率
衆迎戰瑪爾賽佯敗退走數十里文選躡追科爾
崑突出其背呼噪縱擊文選後軍亂瑪爾賽還師
夾攻賊潰遁遂取黃平明年還京初李自成死其

黨散處湖廣大兵既定湖南貴州乃竄伏歸州興

山間

聖祖仁皇帝康熙二年

命都統穆里瑪為靖西將軍都統圖海為定西將軍統八
旗兵赴荊州會合湖廣陝西四川兵勦賊科爾崑
領護軍以隨時賊渠李來亨踞茅麓山兩將軍議
分道進討圖海出歸州穆里瑪出宜昌科爾崑率
兵五千與前鋒統領賴塔先驅遇賊搏戰三戰皆

捷再奪賊壘直抵茅麓山已而賊黨郝永忠黨守
素來援衆且數萬來亨亦悉衆迎戰科爾崑與穆里
瑪登高以望伺賊稍怠下令縱擊大破賊衆日
夕密傳令設伏夜半來亨果率萬餘衆襲我營伏
發敗之明日賊黨數千以大刀藤牌列陣我兵分
兩翼緩進科爾崑擣其中堅賊敗潰時賊倚譚家
砦故巢屯糧為持久計科爾崑復分兵東絕賊運
道師抵石坪賊阻險拒守科爾崑偕總兵徐治都

于大海鮑敬等三路攻拔其柵進至譚家砦偽侯
李嗣名率衆拒戰中流矢死餘賊遁入砦科爾崑
以兵扼其衝斷賊汲道未二旬賊渠高必正黨守
素等率偽侯三人偽官屬一百六十人詣軍門降
科爾崑旋師與穆里瑪合而圖海亦滅劉汝魁諸
賊會師茅麓山令綠旗兵作長圍滿洲兵分守衝
要賊頻犯我軍奮擊之殲殪殆盡來亨自經死餘
黨悉降乃班師叙功授雲騎尉世職八年十一月

卒

賜祭奠如典禮子莫洛洪襲

雅秦

雅秦滿洲正藍旗人姓覺爾禪巴克什達海之長子也天聰七年

太宗文皇帝以達海淹通典籍宣力有年

特賜騎都尉世職

命雅秦承襲兼管佐領事崇德三年隨睿親王多爾袞等

征明毀董家口邊牆進師過燕京趨山東所至克捷師還出青山口遇明邊兵雅秦以步戰敗之明年隨大軍攻松山有功六年鄭親王濟爾哈朗同武英郡王阿濟格等統左右翼將士圍錦州城中兵突出犯我營壘雅秦率所部兵擊退其衆師旋任吏部理事官八年考滿加雲騎尉世職尋調戶部理事官

世祖章皇帝順治元年正月都察院承政滿達海劾奏豫

親王多鐸擅按籍集視八旗女子雅秦復以不在籍女子私與王視下部議罪王罰鍰雅秦削雲騎尉職仍罰鍰四月隨睿親王多爾袞入山海關擊敗流賊李自成二年敘功復加雲騎尉四年考滿晉職三等輕車都尉世襲罔替八年三月授吏部侍郎七月擢國史院大學士十月卒先是雅秦三過

恩詔累晉世職至三等男九年正月

上以吏部前奉

覃恩予襲過濫

命改為一等輕車都尉兼一雲騎尉予其子禪布襲康

熙二十一年

聖祖仁皇帝以逆藩殄滅海宇蕩平

加恩勲舊諸臣

詔遣官致祭雅秦墓

欽定八旗通志卷一百七十五

欽定四庫全書

史部

欽定八旗通志卷

一百七十六至
一百七十七

欽定四庫全書

欽定八旗通志卷一百七十六

人物志五十六

大臣傳四十二

滿洲正藍旗二 伊拜 寧古理
費揚武 烏達禮 對哈納

哈克三 覺羅豁特 穆赫林 勒貝 恭圖
哈占 雅賚 滿丕

伊拜 弟庫邇闡

伊拜姓赫舍里世居齊谷父拜思哈當

太祖高皇帝時來歸授佐領隸滿洲正藍旗既卒伊拜與

其兄宜巴里弟庫邇闡分轄人戶任佐領

太宗文皇帝即位察哈爾部貝勒圖爾濟率人戶來歸

命伊拜迎犒之天聰八年

上統師征明伊拜齎

勅往科爾沁部調兵隨征是年五月以克副任使予雲騎

尉世職九年擢任正白旗蒙古都統崇德元年隨

武英郡王阿濟格征明入長城攻克昌平等州縣

俘獲甚衆師還出邊敵襲我後隊繼刦掠因論伊

拜不殿後及徇隱軍士失律諸罪坐罰鍰三年九月隨睿親王多爾袞征明由青山口入邊越燕京略山東四年三月凱旋以過三屯營時佐領喇巴希為敵所困伊拜未助戰罰馬一又其僕與軍士爭草鬪毆伊拜袒其僕以鳴鏑射軍士復罰鍰五年大軍圍明錦州伊拜遇杏山敵騎率本旗兵擊敗之復連敗松山騎兵步兵後敵騎復自杏山來犯伊拜邀擊多斬獲又同左翼軍擊卻錦州城中

出戰敵兵六年攻錦州破其山嶺步兵復擊敗其
拒戰騎兵叙功晉世職為騎都尉時明總督洪承
疇集兵十三萬駐松山援錦州

上親征陳師於松山杏山間

授諸將方略分布要隘俟敵潰遁截擊伊拜奉

命同副都統譚拜等率兵倚杏山駐營明兵自松山竄走
伊拜追逐至塔山敵挫衄及溺水死者無算七年
大軍擒承疇於松山明總兵祖大壽以錦州降伊

拜奉

命駐守杏山是年七月部議圍錦州時敵犯鑲黃旗壕塹
軍士有未戰者伊拜徇隱應罰鍰

上賞之八年十月奉

命與輔國公篇古率將士駐守錦州順治元年調正藍旗
蒙古都統隨大軍入山海關擊敗流賊李自成尋
同都統葉臣等勦賊山西圍太原府城賊出城抗
拒伊拜同都統巴哈納等督兵敗賊克其城招降

附近郡邑師還

賜白金三百兩二年隨英親王阿濟格征陝西敗賊延安
自成走湖廣追勦至武昌連破賊營三年叙功晉
三等輕車都尉五年隨鄭親王濟爾哈朗征湖南
時衡州寶慶諸郡為明桂王朱由榔之將所據六
年春大軍克湘潭伊拜同都統佟圖賴等分兵趨
衡州距城三十里彼兵千餘據橋立寨伊拜督兵
擊之潰進薄城下連敗其寨斬其總兵陶養用遂

定衡州大軍別徇寶慶辰州武岡沅州靖州賊俱
敗遁七年四月凱旋復

賜白金三百兩八年以年老解都統任九年

命為議政大臣疊遇

恩詔晉爵至三等男十五年卒年六十有五

贈太子太保謚勤直

賜祭葬如典禮立碑墓道以其第三子費揚武襲爵伊拜
弟庫邇闡初任佐領天聰九年隨副都統巴奇蘭

征黑龍江有功予雲騎尉世職崇德元年授都察院理事官兼任叅領五年隨工部承政薩穆什喀征索倫部與其部長博穆博果爾力戰卻之師還以俘卒適去論監守不嚴應鞭責

上念其曾與博穆博果爾力戰停其叙功免罪仍

予賞賚尋隨睿親王圍明錦州擊敗杏山敵騎及松山步

兵又同左翼軍擊敗錦州城中出犯兵六年擢都察院叅政復隨鄭親王圍錦州敵騎自松山來奪

我紅衣礮庫邇聞擊卻之旋率兵據守山寨敵來
犯勢甚衆時薩穆什喀別守汛地欲遣兵助戰庫
邇聞以敵易禦辭之遂獨率所部奮擊敗敵斬四
十一人獲雲梯鎗礮甲楯旗纛叙功晉世職為騎
都尉八年擢正藍旗蒙古副都統順治元年隨大
軍入山海關擊流賊李自成追敗之望都叙功加
一雲騎尉二年正月隨豫親王多鐸擊流賊於潼
關連破其兩營叙功晉三等輕車都尉尋以考滿

稱職晉二等四年六月奉

命率兵駐防濟南會土賊謝遷等陷淄川縣城庫邇聞遣
所部兵並調綠旗兵往援部議其不親赴勦罪應
罰鍰解副都統任草世職得

旨倍其罰餘寬免明年擢都察院承政尋仍改為叅政六
年同都統譚泰征江西叛鎮金聲桓卒於軍遇

恩詔晉世職為一等輕車都尉以其子舒赫襲

寧古理

寧古理滿洲正藍旗人姓託和洛崇德三年任吏部主事六年大軍圍明錦州寧古理隨鄭親王濟爾哈朗營以擊敗敵兵馳齊捷奏七年錦州降復以降人及所獲簿籍馳奏順治二年四月遷吏部啟心郎四年五月山東巡撫張儒秀以罷歸侍郎孫之獬因土賊謝遷陷城遇害為請卹部臣陳名夏金之俊謂應復其原銜予卹寧古理與侍郎馬光輝謂孫之獬既革職為民例不予卹以兩議上

得

旨申飭議卹非例是年考滿

予雲騎尉世職嗣兩遇

恩詔晉世職騎都尉兼一雲騎尉八年閏二月以前此吏部銓選有越格濫用者革啟心郎任會御史張煊劾奏尚書陳名夏在吏部專權徇私諸款並言其以尚書而卸罪於啟心郎致寧古理革任已得脫然時尚書譚泰因陳名夏與已同掌吏部坐張煊

誣陷罪未幾譚泰以把持部務恣意妄行獲罪

上命寧古理仍為啟心郎十年五月擢吏部右侍郎十三年四月因河西務鈔關員外郎朱世德虧課萬餘兩戶部援

赦免罪吏部亦弗置議並坐贍徇寧古理草任降世職為雲騎尉十四年四月

上以寧古理前在吏部諳習事務

命遇侍郎缺出即與推補十六年正月授禮部右侍郎十

八年閏七月擢左都御史十二月疏言定例駐牧
察哈爾蒙古向京城置買盔甲弓箭由八旗都統
造冊送部出口時察驗放行其他蒙古不得私買
恐日久禁弛有借名置買及私相轉賣之弊請

旨嚴飭關隘官員察詰並令蒙古都統以下叅領佐領以
上申禁又設兵原為勦賊之脩近見各省匪徒或
數千人嘯聚總督提鎮不親率標兵堵禦輒請京
兵京兵一出不惟費餉亦且擾民請嗣後有竊發

者總督提鎮先率標兵勦捕不得輒請京兵則餉
運可省而民生得安又各省罪犯應解部審者向
來各部差官提解仍須州縣官遞送今驛遞繁苦
宜概令在外督撫提鎮解送停止差官以省供應
之費下部議從之康熙元年七月遷戶部尚書二
年二月卒部臣以任尚書未滿一年奏

諭曰寧古理雖為尚書未久念初設六部之時即在部任
事可予尚書卹典

賜祭葵謚勤敏子色楞襲雲騎尉世職

費揚武

費揚武滿洲正藍旗人姓納喇由護軍校累遷叅

領

太宗文皇帝崇德七年冬隨饒餘貝勒阿巴泰征明甫入

遼明山海關總兵馬科迎戰費揚武擊敗其衆遂

越燕京趨山東既至膠州明兵千餘屯城外費揚

武奮勇挫敵乘勝薄濱州領雲梯兵先登攻克其

城及師還明總兵范志完總兵吳三桂等分兵阻截費揚武先後破走之護所俘獲出邊凱旋叙功予雲騎尉世職管佐領事

世祖章帝順治元年四月隨睿親王多爾袞入山海關破流賊李自成騎兵尋署護軍統領隨豫親王多鐸追勦李自成師抵潼關賊將劉宗敏等引衆出禦費揚武率本旗護軍擊敗山下步騎賊衆復連破其兩營二年三月豫親王移師南征費揚武同

護軍統領固納岱伊勒都齊等率兵攻揚州城南
獲船二百餘又同護軍統領阿爾津擊敗江寧府
境步兵追勦至蕪湖明總兵黃得功拒戰費揚武
擊敗其眾獲船三十有一尋隨端重親王博洛征
浙江同前鋒統領鄂碩副都統卓布泰等擊走明
閩部馬士英於杭州生擒偽總兵一復率兵勦平
海寧平湖二縣土賊獲明總兵王之仁戰艦十有
六十二月授議政大臣先是叙入闕破流賊功由

雲騎尉晉騎都尉至是叙江南浙江功績加一雲騎尉世襲罔替四年仍署護軍統領從征福建卒於軍以其子雅素哈襲職

烏達禮

烏達禮滿洲正藍旗人姓納喇世居輝發祖曰三檀

太祖高皇帝時來歸任佐領父曰薩珠瑚烏達禮其次子也初為前鋒侍衛兼王府長史

太宗文皇帝崇德八年擢國史院學士

世祖章皇帝順治元年隨豫親王多鐸征河南陝西二年

隨征江南三年隨端重親王博洛征福建時明唐

王朱聿鍵僭號福州海賊鄭芝龍受爵為平國公

大軍入閩擒斬聿鍵芝龍猶擁兵觀望端重親王

遣烏達禮赴泉州開諭之芝龍乃降四年考滿授

雲騎尉世職五年擢工部啟心郎八年調刑部啟

心郎屢遇

恩詔晉世職三等輕車都尉十一年正月

上以八旗逃人日衆增設兵部督捕侍郎郎中員外主事等官另置解署專理緝捕事擢烏達禮為左侍郎
十三年五月以逃人緝獲者少督察不嚴坐贍徇
除世職尋

諭以洗心滌慮改過自新復職如舊會考滿蔭一子入監
十一月同右侍郎梁清遠疏陳四事一申禁奸棍
窺探緝獲之犯一嚴懲解役踈縱窩逃之人一分

晰誣告逃人坐罪之條一增詳逃人自首銷檔之例得

旨如所請行十七年

甄別部院諸臣以烏達禮職司督捕弗任勞怨下部議處降世職為騎都尉改任通政司通政使

聖祖仁皇帝即位擢任吏部侍郎康熙五年因病解任八年九月起任刑部侍郎旋擢工部尚書十四年轉刑部十六年三月轉禮部八月轉吏部二十年三

月致仕五月卒

賜祭葬如例以其孫阿林襲職

對哈納

對哈納滿洲正藍旗人姓鈕祜祿

世祖章皇帝順治二年由內院筆帖式遷工部主事九年
遷郎中十一年遷刑部啟心郎十五年裁缺十七
年補都察院左副都御史十八年二月遷刑部侍
郎康熙五年擢本部尚書六年五月

聖祖仁皇帝詔臣工指陳民生利病對哈納同尚書郝惟訥侍郎麻勒吉等疏言賣身旗下之人每與民間構訟或本主為之代告稱妻子寄居其家田宅財物坐落某處某某借銀若干類多捏詞索詐株連無辜竊思有銀有產之人豈肯賣身亦無存留妻子而獨賣己身之理請嗣後通飭八旗及直隸各省遇此等控詞概不准理庶狡徒稍戢民生得安疏入從之七年九月授國史院大學士充

世祖章皇帝實錄總裁官八年七月

諭曰刑部事務殷繁人命所繫必得才猷練達之人方克
勝任大學士對哈納諳練刑部事務着加太子太保以
國史院大學士管刑部尚書事九年以內三院為內閣
對哈納改文華殿大學士會吏部尚書馬希納解
任調對哈納管吏部尚書事十一年七月副都御
史李之芳疏言部院官失察胥役犯贓應如州縣
例革職吏部以部院官員例不關防胥役寢其議

上以京官雖與外官有間不應迥異下九卿科道會議尋

議外官改罰俸一年京官應罰俸六月得

旨申飭令再議

諭責對哈納曰衙役作弊小民受害無窮所司官理應從重處分以清積蠹今爾等俱已富貴不念小民困苦惟恐重處屬員致有干涉初議京官不應處分繼議外官亦從末減明係瞻徇朕擢爾吏部尚書自應殫心為國矢公報効乃全無主見殊負委任之意于是定議外官

處分仍舊部院司官失察書吏犯贓不及十兩者
罰俸一年過十兩者降一級留任十二年六月疏
言舊例各省司道府州縣召募經制書辦典吏
攢典等役恐積久弊生一歲一次轉撥約有數萬
人甚為繁擾且致文冊生疎每多舛訛遺漏請照
督撫鹽院衙門之例五年役滿停其轉撥得

旨先行十三年二月以病乞休

溫旨慰留十四年九月卒于官年五十有七

賜祭葬如典禮謚曰文端

哈克三

哈克三滿洲正藍旗人姓佟佳父法薩理巴圖魯
任駝騎校出征戰歿哈克三其長子也

世祖章皇帝順治二年任禮部筆帖式累遷至員外郎十
四年改授護軍叅領

聖祖仁皇帝康熙二年隨靖西將軍穆哩瑪征湖廣流賊
李米亨等三年賊竄入茅麓山哈克三同護軍統

領堪泰由山後進攻來亨敗卻遣其子撫險等砦
列烏鎗拒戰我軍奮擊敗之賊潛遁復糾衆刼總
兵于大海營哈克三與大海併力攻擊多斬馘來
亨自經死八年擢正藍旗蒙古副都統十二年八
月調本旗滿洲副都統十月遷護軍統領十四年
三月察哈爾布爾尼叛

命撫遠大將軍信郡王鄂扎副將軍圖海往討哈克三叅
贊軍務四月師次達祿布爾尼列陣以待潛設伏

山谷我師進勦遇伏發犯我土默特兵哈克三率
中隊兵力禦敗之後偕衆擊賊營賊甫列火器我
師以驍騎衝擊賊潰奔斬馘甚衆布爾尼以三十
騎遁去為科爾沁額駙沙津射斃察哈爾平叙功
予哈克三世職為三等輕車都尉十六年三月

命同都統勒貝副都統布舒庫叅贊簡親王喇布軍務時
逆藩吳三桂賊將韓大任等踞萬安哈克三與副
都統雅沁等分兵往勦既至大任渡河遁走哈克

三以山路險狹騎兵難騁請調綠旗兵相機守隘
斷其餉道俾賊無從逸出簡親王以

聞奉

諭曰逆賊韓大任已無外援宜乘此時即行蕩掃乃藉口
調兵延引時日使賊得固守殊悞機宜其令哈克三等
乘賊勢感併力窮追務在剪除毋縱賊入楚十二月賊
由萬安遁入興國縣山中哈克三率師追及之黃
塘殺賊百餘賊復糾聚千人固守新田鋪口我師

步行奮擊擒賊甚衆又選輕騎乘夜追勦至姜坑
嶺賊黨陳堯元李茂珠以五千人據嶺拒守哈克三
分兵四面仰攻殲其偽副將等六人斬馘千餘於
是韓大任陳堯元李茂珠等走福建踞老虎洞賊
衆萬餘人明年三月哈克三與都統巴雅爾副都
統錫三雅沁布舒庫分隊奪隘前進破其六營殲
賊六千餘擒斬偽總兵以下三百人獲旗幟器械
無算大任等窮蹙會康親王傑書遣人招撫大任

率衆降哈克三還吉安

命赴湖南與將軍穆占會師勦賊尋駐守彬州六月三桂

據衡州遣賊黨馬寶胡國柱等糾賊三萬犯永興
穆占令哈克三率兵援勦禦之河外營奮力擊賊
賊勢猖哈克三與都統伊里布皆戰歿事

聞

諭穆占曰凡遇賊寇必審己量力可擊則擊之如賊衆我
寡即宜調集諸路合為一軍壯聲勢以圖攻勦今逆賊

大隊犯永興我兵分駐他處遇戰力單以致失利我朝諸將遇敵雖兵力單弱亦不退縮必奮勇攻擊是以都統伊里布護軍統領哈克三等陷歿于陣聞之不勝傷悼十八年十月喪還

命內大臣噶布拉奠茶酒復

遣內大臣佟國維齎銀五百兩

賜其家傳

諭曰哈克三臨陣捐軀戮力盡瘁殊為可嘉特賜銀五百

兩其舉殯時仍遣內大臣一員并侍衛往送

賜祭葬如典禮謚武毅晉世職為一等輕車都尉兼一雲

騎尉弟之子巴爾泰襲

世宗憲皇帝時以哈克三入祀昭忠祠

覺羅豁特

覺羅豁特滿洲正藍旗人

景祖翼皇帝第五子恪恭貝勒塔察篇古之三世孫也父

穆成額以軍功授雲騎尉順治三年豁特襲職因

近族加騎都尉三遇

恩詔遞加二等輕車都尉世襲罔替尋授佐領累遷護軍
叅領兵部理事官十七年擢鑲藍旗滿洲副都統
康熙三年隨豫親王多鐸進勦蘇尼特叛人騰機
思有功加一等輕車都尉九年擢鑲藍旗蒙古都
統十三年逆藩吳三桂耿精忠叛分犯江西豁特
偕護軍統領朗素等隨安親王岳洛往勦十四年
五月大軍克建昌賊將許定國據新城縣豁特偕

前鋒統領覺羅舒恕等圍克之生擒定國十六年
十二月逆賊朱秦等犯湖南平江縣豁特迎敗之
斬六千餘級擒偽副將二遊擊一守備六十七年
閏三月剿馬棚賊邱義尚於七家洞擒斬無算又
降偽總兵朱永升等俱得

旨嘉獎是年六月豁特卒於軍先是安親王既克建昌欲
平附近餘孽檄豁特取石匣村失利安親王疏

聞

命事平察議二十二年議政王大臣議豁特在石匣交戰
未收官兵骸骨並失軍礮應革職籍沒家產編入
包衣佐領奏入

諭曰覺羅豁特失誤軍機理應依議但係覺羅編入包衣
佐領為奴似屬不便著免其編入尋

命留豁特父穆成額所立雲騎尉世職以豁特從子訥秦襲
穆赫林

穆赫林姓博爾濟吉特祖索諾木為烏魯特部台吉

太祖高皇帝天命七年索諾木同貝勒明安等率所屬人
戶來歸別立烏魯特蒙古一旗

賜賚優厚屢從征有功予爵二等子

世祖章皇帝順治十二年追謚順良視一品大臣例立碑
穆赫林之伯父博琫初襲索諾木爵

太宗文皇帝天聰六年從征察哈爾以俘獲數少及私行
畋獵諸罪削爵改隸正藍旗滿洲穆赫林之叔父
僧格襲三遇

恩詔晉爵至三等伯順治九年卒穆赫林襲爵

聖祖仁皇帝康熙五年授正藍旗滿洲副都統尋列議政

大臣十三年四月

命同都統拉哈達率兵駐防兗州旋

命移駐江寧時逆藩耿精忠叛應吳三桂

上命康親王傑書為大將軍貝子傅喇塔為寧海將軍穆

赫林率駐守江寧之喀喇沁土默特兵赴浙江會

剿十四年穆赫林隨傅喇塔征台州偽都督林冲

糾衆萬餘列十三寨于白水洋穆赫林督兵攻拔賊寨斬獲無算擒偽總兵朱富復仙居縣城遂由黃岩進征偽將軍曾養性偕叛鎮祖宏勲據温州分水陸迎犯穆赫林擊敗之上塘嶺取賊艦三十餘偽總兵彭國明率衆五千餘瀕江列寨穆赫林率兵至寶帶橋分布隊伍指麾攻擊摧賊鹿角斬級千餘盡獲其鎗礮旗幟遂駐軍江岫賊數來犯輒戰卻之温州統城有河引江水入焉閘以蓄之

我軍欲毀閘以涸水輒為賊阻久相持未能薄城
時康親王駐金華檄傅喇塔與穆赫林速攻城穆
赫林言必多取大礮至乃可克十五年二月

上諭責王貝子等遷延康親王因劾奏穆赫林與副都統
吉勒塔布提督段應舉等抗違軍令瞻顧不前狀
詔事平日議罪八月康親王由衢州攻克仙霞關招降耿
精忠從曾養性祖宏勳等至福州温州平檄穆赫
林移師福建駐守延平海賊鄭錦使其偽將軍吳

淑偽總兵吳潛由邵武犯延平穆赫林率兵擊之
浦塘隘口陣斬偽總兵楊大任生擒偽總兵阮信
等破其木城獲軍械無算乘勢追勦復邵武汀州
二府及所屬縣十六年賊屢窺犯泉州及潮州陷
所屬城邑穆赫林與副都統沃伸總兵馬三奇等
一再擊敗之十七年三月賊犯海澄穆赫林與海
澄公黃芳世率兵迎戰於灣腰樹賊勢猖獗我兵失
利退保海澄賊復糾衆環逼阻我聲援據高阜瞰

城中礮石交下穆赫林同提督段應舉協力固守糧盡身負重創六月乙卯城陷穆赫林與應舉並自經死及賊平議政王大臣等追論穆赫林征溫州時抗違軍令擊海賊時于灣腰樹戰敗及被困海澄援兵將至不奮力突圍城陷後急迫自盡應追革官爵籍沒家產

上念穆赫林屢著戰功寬免籍沒以僧格之孫赫達色襲三等伯

世宗憲皇帝時穆赫林與段應舉並入祀昭忠祠

勒貝

勒貝滿洲正藍旗人姓郭爾羅父鄂羅塞臣官左都御史謚果敏有傳勒貝初授侍衛兼佐領順治十八年由一等侍衛授正藍旗蒙古都統康熙八年調正藍旗滿洲都統十六年三月吳逆未平

上以簡親王喇布出師江西久無功其叅贊大臣均不勝任命勒貝及護軍統領哈克三副都統布舒庫往代之十月

鎮南將軍莽依圖由廣東進定廣西

命勒貝偕江寧將軍額楚守韶州十二月

諭曰韶州地屬緊要一切軍務若令簡親王轉奏恐有遲

誤其令額楚統轄兵馬勒貝叅贊軍務凡事許得專奏

十七年二月

上以梧州為兩廣接壤要地

諭勒貝同額楚往戍時逆賊祖澤清據高州叛陷鬱林州及

北流興業陸川博白四縣四月勒貝偕將軍傅宏

烈等擊敗偽總兵梁子玉于白米嶺斬之偽總統
饒一龍等各棄城遁一州四縣盡復十六年吳逆偽
將吳世琮圍南寧總督金光祖遣總兵譚昇等與戰
於新村西山之巔勒貝偕額楚及副都統額赫納
等分路撲勦殺賊甚衆世琮重創遁南寧圍解十
九年五月復偕額赫納等勦叛賊馬承蔭于柳州
大敗之於陶登乘勝克象州承蔭降均得

旨嘉獎下部議叙八月莽依圖卒於軍

上以勒貝代為鎮南將軍尋

命隨征南大將軍都統賡塔進定雲南即令叅贊軍務十

二月大軍抵西隆州偵偽將軍何繼祖王宏勳
等糾衆萬餘扼定籠所之石門坎勒貝與都統希
福等先驅二十年正月抵其地攻克第一峯第二
峰第三峰奪隘口復安籠所城繼祖等走復糾偽
將軍詹養王有功等九人衆二萬餘守黃草壩列
衆拒戰二月勒貝率次官兵隨大將軍賡塔進勦

生擒詹養王有功及賊千餘直抵雲南城逆孽吳
世璠自殺雲南平班師勒貝以疾道卒柩至京

命內大臣往奠二十二年

賜祭葬如例

恭圖

恭圖滿洲正藍旗人姓兆佳康熙四年由閒散授
世管佐領六年補安親王府長史九年授叅領十
二年擢本旗蒙古副都統十四年大兵勦吳三桂

詔恭圖統領蒙古兵駐防河南尋

命帥師赴荊州十五年三月隨鎮安將軍噶爾漢攻南漳縣之靈機寨焚賊營賊三千餘迎敵擊敗之得

旨嘉獎十六年十月同征南將軍穆占率兵赴安親王岳樂軍於長沙十八年隨征武岡州賊帥吳國貴馬寶擁兵二萬四千據隘口恭圖偕副都統伊巴漢等攻之三晝夜礮斃吳國貴追至楓木嶺之木瓜橋賊衆悉潰十九年調滿洲副都統二十年隨大

將軍貝子章泰進兵雲貴時偽將軍線纈據江西
坡我兵奮擊賊帥夜遁恭圖追至蠟茄坡再戰復
敗之恢復新興所普安州二城復隨大軍敗賊
將胡國柄等於歸化寺雲南平還京二十三
年議政王大臣遵

旨甄別都統副都統等官以恭圖不能彈壓所屬議革職
得

旨恭圖前曾奏請休致不可列衆人中黜退可仍留原任

二十四年因病解任尋卒于家

賜祭葬如例

哈占

哈占滿洲正藍旗人先世居葉赫姓伊爾根覺羅
哈占由官學生為鴻臚寺贊禮郎累遷吏部員外郎
郎中兵部督捕理事官

聖祖仁皇帝康熙八年授秘書院學士十一年擢工部侍
郎十二年九月授陝西總督甫之任逆藩吳三桂

反四川巡撫羅森提督鄭蛟麟總兵吳之茂譚宏
叛應之與三桂所遣偽將軍王屏藩等合謀寇陝
西

上命都統赫葉為安西將軍護軍統領瑚里布為副將軍
同西安將軍瓦爾喀進征四川

詔哈占同巡撫杭愛等運軍餉並與甘肅提督張勇陝西
提督王輔臣協力捍禦邊境綏輯軍民十三年三
月

命尚書莫洛經畧陝西凡事與哈占會商而行哈占以漢中廣元山路險峻奏于略陽水道造船接運借山西穀二十萬石協濟六月

命貝勒洞鄂為定西大將軍統轄征四川將士時興安總兵王懷忠率兵四千隨將軍瓦爾喀征保寧哈占遣遊擊程福亮率兵防守興安叛鎮楊來嘉自鄭陽連結王屏藩等犯興安福亮擊敗之漁渡路八月莫洛自請領兵先是貝勒洞鄂由秦州征四川

哈占以洛陽糧艘為賊所刦餉運難繼奏入

上命四川總督周有德等經理廣元至保寧輸運

諭哈占飭屬速運廣元相繼毋悞哈占因疏言陝西官民
疲于輓輸請令山西省協助

上曰山西運糧水路則有黃河汾渭之險陸路道遠勞費
尤甚其令戶部發庫銀十五萬兩遣員齎至西安採辦
酌增其直俾民間獲什一之利樂于輸送自可源源接
濟十二月王輔臣叛於寧羗莫洛遇害貝勒洞鄂由漢

中還西安十四年正月

詔洞鄂征秦州哈占分兵防守蘭州哈占疏言西安兵少
不宜分遣又疏請增兵

上命移荊州兵一千以雲貴總督鄂善率赴西安旋

諭鄂善移兵守延安哈占復奏留之時同州遊擊李師膺

倡叛殺韓城知縣翟世琪脅神道嶺營卒聯結蒲

城土賊陷延安固原道陳彭定邊副將朱龍皆以

城叛王輔臣據平涼其黨分據秦州鞏昌慶陽陷

蘭州洮州河州復阻截棧道陷漢中哈占遣將勦賊于汾州淳化三水長武漢陰石泉甘泉寶雞諸處屬秦捷六月貝勒洞鄂復秦州提督張勇復鞏昌洮州河州寧夏提督陳福復定邊平逆將軍畢力克圖復延安西寧總兵王進寶復蘭州

詔趣洞鄂督諸路兵合攻平涼哈占以興安遊擊王可成叛奏移潼關綠旗兵守商州移西安滿洲兵守潼關尋又以興安叛兵與蜀寇合已陷商州舊縣關

將逼西安南山羣盜又分出各口乞

敕貝勒洞鄂將軍畢力克圖等發兵赴西安應援

上切責之曰始王輔臣叛朕以蘭州為近邊要地令哈占
發兵鎮守哈占謂西安兵少不宜分遣致蘭州諸處淪
陷嗣以延安為諸路要衝命鄂善周有德等駐守哈占
又留之西安致延安陷沒哈占為封疆大臣遇事不周
詳籌度祇欲重兵自衛貽誤非小今又謂叛兵與蜀
寇合欲諸將分兵赴西安是但知有西安置他處于度

外矣且蜀寇何能即至西安因諸將齊赴平涼改為聲揚欲亂我軍心分我軍勢耳諸將當益急攻平涼其現駐太原兵令將軍烏丹率赴潼關防守現駐榆林之蒙古兵令理藩院員外郎拉篤祜率赴西安以脩勦禦九月哈占疏報慶陽從逆知府王文紳守脩路調鼎等擒偽總兵南一元獻城投歸十五年

上命大學士圖海代洞鄂為大將軍攻圍平涼王輔臣降哈占疏陳安輯降衆復設官屬等事俱下部議行

十七年以失察布政使伊圖侵蝕採買價直部議革職

詔從寬留任十九年正月將軍趙良棟王進寶等復成都保寧四川郡邑相繼底定哈占疏言軍餉由陝西運至保寧應令四川官屬接運

上以四川初定恐難驟供轉餉

諭哈占即令陝西運官以略陽糧艘運至叙州八月

詔哈占簡本標及綠旗各營精銳率赴保寧規復雲貴十

月哈占疏言臣進兵保寧所需糧餉若以陝省所
運支給不足于用請

命四川督餉官盡心經理又言叛賊譚宏彭時亨等四出
剽掠臣自漢中往保寧所統兵無幾請

敕陝西甘肅巡撫提督撥兵略陽陽平寧羌廣元諸要地
防守

上俱允所請會侍郎趙璟金鼐奏言陝西轉餉入蜀運官
不知軫恤人民滋困尚書宋德宜亦言陝西四川

宜以一總督統理庶人民勞逸可以酌劑均平于是裁四川總督以哈占為川陝總督哈占既至保寧遣總兵高孟勦彭時亨敗賊衆於南溪羅石橋諸處復營山縣渠縣哈占尋疏言臣今奉

命為川陝總督或應領兵進征或駐兩省適中之地調遣策應

諭其速滅譚宏彭時亨即進征雲南二十年正月鎮南將

軍噶爾罕奏報譚宏已死忠州萬開建始雲陽梁山等縣賊巢俱平高孟追擊彭時亨亦復廣安州達州大竹東鄉等縣

詔哈占率所屬兵馳赴叙州會建昌永寧兩路兵進征哈占疏言永寧一路大兵急需糧餉陝西輸運困敝請於永寧瀘州諸處採買支給遂

允所請發西安庫銀六萬兩遣員齎往五月疏言臣兵發永寧由赤水畢節追勦逆賊馬寶進征雲南兵少

力弱請令現駐叙州之固原總兵官王用予為後
應

敕用予即率兵馳守永寧時湖南廣西大軍畢集雲南合
圍省城大將軍貝子彰泰以兵多糧少奏言馬寶
既降賊勢窮蹙大兵已足用哈占率兵甫至貴州
威寧宜令還四川以節滇餉因

命哈占還駐要地兼顧川陝哈占至曲靖旋師

詔哈占前此草賊處分子開復尋以彭時亨窮蹙來降叙

哈占遣兵追勦功加兵部尚書銜先是譚宏已死
其黨偽總兵牟一乾牟一舉率衆赴遵義降于提
督周卜世軍散處巴縣涪州至是哈占疏言一乾
等素習奸狡若仍留舊地恐復為患請移之陝西
懦弱者歸農強壯者分各營効用

上嘉所奏協宜如請行又言慶陽協所轄之潼關商州神
道嶺金鎖關四營距慶陽道遠應歸固原鎮統轄
富平營分防六縣汎廣兵單應於郿縣營分兵百

名增隸疏下部議從之二十二年授兵部尚書二十四年四月調禮部尚書十一月以疾乞休自述前此當吳逆作亂捐軀思効晝夜拮据者十年積勞成病得

旨哈占前任川陝總督值大兵進征雲南屢奉旨催促始隨他人之後前往未曾立功乃妄稱捐軀思効晝夜拮据著嚴行申飭仍殫力供職以贖前愆二十五年八月卒年五十有五

雅賚

雅賚滿洲正藍旗人姓納喇初為王府長史兼佐領

聖祖仁皇帝康熙十三年九月

命署副都統率兵駐防江寧未至奉

命移駐安慶時逆藩耿精忠叛應吳三桂遣賊將由福建

陷江西廣信建昌饒州三府及湖口彭澤二縣

上遣安親王岳樂為大將軍統師赴南昌

詔雅賚與署副都統阿喀尼叅贊軍務先由安慶移兵勦賊彭澤十一月雅賚同阿喀尼進征偵知彭澤城北小姑山有賊二百餘據守先遣兵攻勦賊結水寨發鎗礮拒戰我兵統其後陟山而下奪勇分擊斬偽千總陳三省餘賊多創歟及溺水死者獲賊船二取其軍器遂進薄縣城城西臨大江南北皆巖巒路險峻乃督兵趨其東陟山坡樹雲梯登城賊不能抗縱火焚城中廬舍開東門出遁我兵追

擊之殲殪大半獲偽劄及軍器無算遂進征湖口
偽遊擊周立龍偽守備周立虎率兵二百餘來降
會安親王軍至賊聞風棄城遁都昌安親王令雅
賚同阿喀尼勦賊都昌至則賊復竄往鄱陽湖復其
城偽監軍道葉甲偽都司周羅王錫等乞降十四
年二月雅賚同阿喀尼率水師勦賊鄱陽湖先超
五桂寨賊棄寨竄遁賊將黃浩旋合賊衆乘船迎
犯我軍分兩隊交戰賊敗卻追至梅溪瑞洪康山

湖汭壩口先後殪賊數千生擒二百餘口獲船數
百尋會陸路軍于首著灣與護軍統領郎素副都
統珠拉禪等收復餘干縣城四月隨安親王征建
昌賊將邵連登據常興山列營三十雅賚率首隊
兵由山左仰攻諸軍由右夾擊盡破賊營賊無
算連登中流矢死六月同都統霍特進征廣昌次
石峽天暑人馬疲渴猝遇賊伏我師稍卻雅賚直
前奮戰中礮沒于陣

賜祭葬如典禮謚襄壯予騎都尉世職以其子班第襲
世宗憲皇帝時入祀昭忠祠其世職既襲三次循例停襲
今上乾隆十五年

詔核八旗世職之以死事卹叙而襲次已滿者

特予恩騎尉世襲罔替復以雅賚之四世孫德慶襲

滿丕

滿丕滿洲正藍旗人姓伊爾根覺羅自其曾祖珠
瑚達以來世官佐領康熙十一年由贊禮郎授理

藩院主事十四年遷刑部員外郎十九年授監察御史兼賑管佐領二十五年五月御史李時謙疏論刑部勘鞫原任奉天府通判戴純責處雇工人傷重殞命讞證叅差遽坐故殺擬絞請

敕法司詳勘刑部奏李時謙滿丕于法司會議處共言此案宜改輕由戴純之兄工部員外郎戴綸有賄囑情弊並得

旨下法司再審法司以聽許賄囑定讞戴純仍擬絞戴綸

李時謙滿丕並草職二十八年李時謙以廷臣薦
舉復原官滿丕隨都統郎坦赴尼布楚與俄羅斯
使人費耀多囉等議地界毀雅克薩城而還時

駕幸古北口外行圍滿丕詣

行在奏事處乞代奏願往歸化城北路軍營効力
得

旨滿丕從雅克薩來不必出征暫在行圍之處隨朕進京
二十九年六月授理藩院郎中偕員外郎鄂齊爾齋

敕宣示噶爾丹七月

上命裕親王福全統師往烏蘭布通

親臨邊塞

指授方畧滿丕持噶爾丹奏章還呈

覽于古北口

御營又奏言噶爾丹賊壘與大軍相拒不過百里臣願往

軍前擊賊

上可其奏遂赴烏蘭布通領火器營發鎗礮擊敗賊衆得

頭等功牌是年擢內閣侍讀學士明年遷內閣學士三十一年二月遷理藩院右侍郎明年轉左三
十三年五月將軍費揚古奏噶爾丹遣人至言欲
通貢偵知有男婦三千餘隨行

上命滿丕馳往歸化城詰問來使遣之還仍以噶爾丹奏
章呈

覽七月

詔費揚古進師圖拉尚書阿喇尼率蒙古兵為前哨

諭稱滿丕効力之心甚殷可協同阿喇尼經理驛站尋以圖拉無警撤回三十四年七月

命往歸化城北協理軍務至則散給噶爾丹使人梅宰桑等餵糧宣

敕遣還十一月同副都統阿南達率喀爾喀兵進駐四子部落蘓尼特部落兩界要地偵備三十五年二月上親征噶爾丹由中路以費揚古為大將軍出西路滿丕分管自京派發西路之兩藍旗兵由翁金至圖拉

五月破賊于昭莫多七月奉

詔還歸化城察奏凱旋官兵行糧及撫輯降人諸務九月

自請仍赴費揚古軍同駐喀喇穆綸地十一月奉
詔移駐喀爾喀遊牧界外塔拉布拉克偵防噶爾丹侵掠

三十六年閏三月收降噶爾丹屬人扎木素等由
駙邁送歸化城安插奏述扎木素言噶爾丹前在
薩克薩圖呼哩克夜聞大礮三聲隨有瀚海旁採
捕之人驚告以瀚海飛塵若霧兼聞礮聲大兵已

逼近矣衆皆惶恐擾亂噶爾丹避徙十有六日至
哈薩克圖哈喇阿濟爾罕地扎木素不願從行逸
出來降奏至

報聞未幾噶爾丹果竄死阿察阿穆塔台費揚古班師

上召滿丕還京列議政大臣予雲騎尉世職三十七年三

月同尚書馬齊副都統烏達禪出邊莅喀爾喀諸

部會盟三十八年六月兼鑲黃旗滿洲副都統三

十九年十一月

命往四川總統調發官兵勦撫番蠻四十年二月同提督

唐希順奏分兵三路攻復打箭爐駐兵木鴉十二月奏鴉隴江濱瞻對喇衮草布什咱綽斯甲布諸土目各率所屬戶口投誠繳明代印信號紙應請授五品安撫司之職其副為六品土百戶

頒給印信號紙下部議從之四十一年三月擢正藍旗蒙

古都統五月

召還京四十三年九月以疾乞罷

命原品休致五十二年卒子燕保襲雲騎尉

欽定八旗通志卷一百七十六